



BOB EDMÉ

Inportazioen aurka protesta egiteko, saltoki handi batetik haragia hartu zuten ELBko kideek aurreko astean.

ELBk behartsuenei emandako okela berreskuratu du Boncogelek

Enpresako burua axuria sindikatuak esan bezala saltzera engaiatu da

Hur Gorostiaga / Baiona

Iragan ostiralean ELB sindikatuko artzainek Boncogel saltegian prezio apalean eta izendapen okerre zegoen tona eta erdi ardiki Bihotz Oneko Ostatueta eraman ondoren, enpresako burua bertara joan eta haragia berreskuratu du, ELBk galdegindako arauak beteko dituela hitz emanik.

«LAPURRETA» gertatu eta berehala salaketa ezarri zuen joan den ostiralean Boncogel saltegiko nagusiak. Zeelanda Berritik ekarritako ardi helduen haragia prezio apalean eta axuri gisa saltzeagatik, Euskal Herriko Laborarien Batasuneko (ELB) 50 laborarik Baionako saltegiko hozkailuak hustu zituzten. Oro-tara, tona eta erdi ardiki hartu zuten.

Haragia behartsuendako neguan janaria urririk ematen duen Angeluko Bihotz Oneko Ostatuari eman zioten.

Aste honetan, aldiz, Boncogeleko zuzendaria ostatura joan eta auzitegieta salaketa dela medio haragi guztia berreskuratu du. Hala ere, ELBko ordezkariekin biltzeko xedea agertu eta ardi haragia axuri gisa ez saltzeko engaia-

mendua hartu du zuzendaria, Jean Paul Duhalde ELBko kideak azaldu duenez. «Heldu den aldian, haragia hartuz gero, ez berriz berreskuratzeko gisan egingen dugu», eman du abisu Duhaldek, eskualdeko saltegieta molde berean jotakutako luke-tenei abisu emanez.

Izan ere, aurtun axuriaren prezioak %25 egin du behera. Axuriaren prezioa apaltzea salatzeaz gain, axuria ez den haragia kanpotik ekarria hala bailitzan saltzea salatu du ELBk. Bertako axuria promozionatzeko asmoz, kanpaina bat egiten ari da laborarien sindikatua, bazkari herrikoia antolatuz. Heldu dena igande honetan egingen dute, Larzabalen.

Nekazaritza enpleguak bermatzea eta handitzea da UAGArek helburua

Erredakzioa / Gasteiz

NEKAZARITZA alorreko enpleguei eutsi, eta, ahal dela, enplegu kopurua handitzea da UAGA Arabako baserriarren sindikatuaren jardueraren helburua. Atzo Gasteizen sindikatuko kideak bildu ziren urteroko biltzar nagusian, eta elkartearen konpromisoaren xede hori berretsi zuten.

Europako Batasuneko ordezkariak azken hilabeteotan proposatu duten nekazaritza plangintza berria ez da egokia, UAGAk uste dutenez, besteak beste «prezioak murrizten dituelako eta ez dituelako laguntzak mailakatzen».

Europako agintarien egitasmoen gainera, aurtun Munduko Merkataritza Era-

kundeak hainbat erreforma proposatu ditu, eta nazioarteko komertzioaren liberalizazioa bultzatuko dute. Horri erantzuteko, UAGA mobilizazioak bultzatzeko prest dago, gizartearen euren eskaerak helarazteko. «Lehen sektorearen balio estrategikoa onartu beharko du azkenean gizarteak», adierazi zuten UAGAk.

laburrean

■ ELF Aquitaine energia konpainiak lan taldea %20 murriztuko du bi urteko epean

ELF erregai konpainiak bere lan taldea murriztu egingo du datozen bi urteetan. Zehazki bi mila lanpostu desagertaraziko ditu Frantziako konpainia horrek epe horretan. Hori egitearen arrazoia datozen bost urteetarako aurreikusitako plana betetzea da. Egitasmoaren helburu nagusia irabaziak bikoiztea da, Philippe Jaffre ELFko presidentek argitu duenez. «Badira inolako erabilpenik gabeko lanpostuak, eta oso balio eskaseko lanpostuak», argitu du Jaffrek. Bi mila lanpostu kenduta, ELFren lan taldea %20 murriztuko dute. Petrolio prezioaren jaitsieraren eraginez, ELF Aquitaineko kontuak ez dira enpresako jabeek espero bezain onak izan azken urteetan. Hala ere, iaz 540 milioi euroko irabaziak jaso zituen ELFk.

■ Apirilerako prest edukiko du Lan Sailak kooperatiben legearen erreformarako proposamena

APIRILERAKO prest edukiko du Eusko Jaurlaritzako Lan Sailak kooperatiben lege berria. Arau berriak egungoa indargabetuko du. Kooperatibak sortzeko araudian hainbat aldaketa sartuko ditu Gasteizko gobernuak. Batetik, gutxieneko kide kopurua bostetik hirura jaitsiko da, eta, bestetik, gutxieneko kapital soziala milioi bat pezetatik milioi erdira jaitsiko da. Kide kooperatibista eta kooperatibista ez diren langileen arteko proportzioa ere egokitu egingo du Gasteizko gobernuak. Aldaketa horiek direla medio, Eusko Jaurlaritzak kooperatiben sorrera erraztu nahi du. EAEko Lan Elkartuko Enpresen Elkartearen aldarrikapen nagusietako bat horixe izan da, kooperatibak sortzeko araudia malgutzea, alegia.

■ Ramodin enpresaren toki aldaketari buruzko erabakia hilaren 30ean zabalduko du Europako Batzordeak

ARABAKO Foru Aldundiak ematen dituen zerga abantailak erakarrira, Logroñoko lantegia kendu eta Biasterin lantegi berria jarri zuen Ramodin enpresak duela bi urte. Arabako laguntzek lehia desleiala sustatzen zutela eta Errioxako gobernuak kexua jarri zuen euskal erakundeen aurka Bruselan, Europako Batzordean. Bruselak hilaren 30ean zabalduko du kasu horren gainean hartu duen erabakia, eta, Karel Van Miert Lehiarako jarduneko komisarioak azpimarratu duenez, Batzordearen krisiak ez du alde aurretik ezarritako lan egutegia aldatuko. Ramodin enpresaren erabakiaren aurkako kexuak ez du pisu juridikorik, Errioxako agintariek ez zutelako salaketa jarri, kexua baizik.

■ Enplegu planean gizarte talde kaltetuenean sartzeko eskatu diote autonomoek Espainiako Gobernuari

KANPOKO arrazoiengatik behartutako negozioak itxi behar izan dituzten autonomoak «gizarte talde kaltetuenen» multzoan sartzeko eskatu dio Espainiako autonomoen elkarte OPAk Madrilgo gobernuari. Eskaera hori Bruselara ere helarazi du OPAk, Madrilgo gobernuak enplegu planak Europako Batasunaren onespina behar duelako. Denbora luzez enplegurik gabe egon diren langabeak, emakumeak eta prestakuntzarik gabeko gazteak daude orain gizarte talde kaltetuenen multzoan, eta horiek kontratatze abantaila bereziak izaten dituzte enpresariak. 30-45 urte bitarteko autonomoak ere multzo horretan sartzea nahi du OPAk.

■ Nazioarteko Moneta Fondoak agindutako doiketa fiskala onartu du Brasilgo Kongresuak

NAZIOARTEKO MONETA FONDOAK (NMF) aurrekontuetan eta zerga politikan hainbat erreforma egiteko agindu zion Brasilgo gobernuari. Herri horretako Kongresuak hori egiteko arauari argi berdea eman zien atzo. Batetik, etxeko gainera zerga %0,2tik %3,8ra igotzea onartu dute legebiltzarreko ordezkari brasildarrek, eta igoera hori ekainaren amaiera aldera sartuko da indarrean. Kapitalen mugimenduaren gainera tasa hori zen NMFk agindu eta Brasilgo gobernuak oraindik onartzeko zeukan neurri bakarra. NMFk 41.500 milioi dolarreko laguntza berezia eman dio Brasili, udaran jasan zuen finantza krisiaren ondorioak konpondu ahal izateko. Baina, laguntza hori jasotzeko, aurrekontuak murriztu eta zerga eremuan sakoneko aldaketak sartu behar izan ditu Brasilgo gobernuak.